

**Siunnersuut: Meeqqanut sulii atualinngitsunut perorsaanikkut inerikkiartuutaasunik ulluunerani neqerooruteqartarneq pillugu Inatsisartut peqqussutaata allanngortinneqarnissaanut Inatsisartut peqqussutaat**

(Pisinnaatitsissutit qanoq ittuunerannik il.il. erseqqissaaneq)

(Kultureqarnermut, Ilinniartitaanermit, Ilisimatusarnermit Ilageeqarnermullu Naalakkersuisoq)

**Saqqummiussissut**

**Siullermeerneqarnera**

Matumuuna Naalakkersuisut sinnerlugit Meeqqanut sulii atualinngitsunut perorsaanikkut inerikkiartuutaasunik ulluunerani neqerooruteqartarneq pillugu Inatsisartut peqqussutaata allanngortinneqarnissaanut Inatsisartut inatsisissaattut siunnersuut saqqummiutissavara.

Meeqqanut sulii atualinngitsunut perorsaanikkut inerikkiartuutaasunik ulluunerani neqeroorutinut akiliuteqartarneq pillugu Namminersorlutik Oqartussat nalunaarutaat nr. 17, 27. november 2009-meersup atuutsinneqalernerata kinguninngua Inatsisartut Ombudsmandiata paasitippaa, qulaani nalunaarummi taaneqartumi akiliisussaataitanermit malittarisassat meeqqanut sulii atualinngitsunut perorsaanikkut inerikkiartuutaasunik ulluunerani neqerooruteqartarneq pillugu Inatsisartut peqqussutaanni naammattumik tunngavissaqanngitsoq.

Naalakkersuisut taamaattumik naleqquttuusoraat malittarisassatut tunngavissap ersarissarneqarnissaa, taassumalu ilutigisaanik pisinnaatitsissutitut malittarisassat allat aamma ersarissarneqarlutik.

Taamatut oqaaseqarlunga siunnersuut Inatsisartunut oqaluuserisassanngortippara.